

te ngaro o te tangata mate e kore e hoki mai. "He ngaro tangata ora, ngaro ake a ka kitea ano, tena he ngaro tangata mate, e kore hoki e kitea ano." Ehe ana tenei whakatauki i runga i te tikanga o te whakapono. Ahakoa mate te karaitiana, ebara i te ngaro i ona whanaunga, i ona hoa, engari he haere i te tuatahi ki te wa kainga, kaore hoki he kainga pumau mo te karaitiana i konei, a tera ke atu ano he okiokinga mo te iwi a Te Atua, e tino rite ai enei kupu, "Mutu ake i reira te whakararuraru a te hunga kino; okioki ana i reira te hunga kua mau iui." (Hopa. 9.17). "Na, e kore ahau e pai, e aku teina, kia kuare koutou ki te hunga kua moe, (he moe te mate ki te karaitiana) kei koingo koutou, kei pera me era atu kahore nei o ratou tumanakotanga atu." (1 Teharonika 4.18). "Kua whiti ata ratou i te mate ki te ora." He manene te karaitiana i tenei ao, "He ngaro tangata ora." Ko tenei he kupu ma te hnga whakapono ina hoki mai a Te Karaiti hei kingi mo tenei ao. He tika ano kua ngaro atinana ia, otira "he ngaro tangata ora," apopo ia te heke iho ai i runga i nga kapua o te rangi, me tana hunga tapu—e heke iho ia he nui te kororia me te mana. Ko taua ra karanga ai te hunga i whakaparahako kia ia, i whakaha-wea, i takatakahi i ona toto tapu, "E nga maunga horo iho ki runga kia matou: e nga pupepuke hipokina matou"; a taua ra ano hoki te hunga i tahuri kia ia, i uru ki ona mamaetanga, hari nui ai, hamama ai te reo ki te karanga," Amine. Ae ra, haere mai, e te Ariki e Ihu." (Whakakite 22.20). E te kai-korero, ki te puta mai a Te Karaiti inaianei ano, ka pehea tau karanga?

"Ka mate kainga tahi, ka ora kainga rua." Te tikanga o tenei whakatauki mo te mate kai. I te mate kaitanga o tetahi o nga kainga o te tangata, ka haere ia ki te rua ona kainga, ki te wahi e hua ana te kai. Ka ahei ia ki te ki. "Ka mate kainga tahi ka ora kainga rua." Ka rite pea tenei kupu mo Hakopa. I te mate kaitanga o te whenua o Kanaana, heke ana ia me tona whanau ki te whenua o Ihipa, ki te whenua nui te kai, ki te kainga hoki kua rite mai i tana tamaiti i a Hohepa hei tukunga atu mona. Waihoki e rua ano nga kainga o te Karaitiana, ko tenei ao, me tera ao, ara ko te kainga kua riro atu nei to ratou Ariki kei te taka mai hei tukunga atu mo ratou. "Kei pouri o koutou ngakau. . . . He maha nga nohoanga i roto i te whare o toku Matua. . . . Ka haere ahau ki

te mea i tetahi wahi hei tukunga ake mo koutou" (Hoani 14, 1, 2). Te aroha nui o te Tama a Te Atua! I timata mai tona aroha i te whenua - i te puke ki Kawari—a tae noa ki te rangi—ki te torona o tona alutau. Apopo nga Karaitana mangere, ngakaukore, te pera ai me nga tuakana o Hohepa te whakama ai, te tangi ai ina tino mohio ratou ki te hohonu o te aroha o Te Karaiti. Ae, e rua nga kainga o te Karaitiana, ko tenei ao, ko tera ao. Otira ahakoa kei te ao nei ratou, ehara ratou i te ao (Hoani 17, 14, 15). I koingo te ngakau o Paora ki te haere ki tona kainga tuturu, "E karapitia mai ana hoki ahau e nga mea e rua he hiahia nei toku ki te haere, kia noho ai ahau kia Te Karaiti; ko te mea tino pai rawa hoki ia." (Piripai 1, 23). Ko Te Karaiti te whaiapo a Paora. Otira ahakoa te koingo o tona ngakau kia wawe ia te tae ki te karauna kua rite mai mona, ki tetahi hoki o "nga nohoanga maha," mea atu ana ia ki nga tangata o Piripai, "Ko te noho ia i te kikokiko, engari tena he pai mo koutou." E te Kai—korero mou tetahi o aua "nohoanga maha," kei whakaparahakotia e koe te aroha o Te Atua. Ko te hea kainga tau e whai ana? Kei rite ra koe ki te purerehua e reereere noa iho ana. Ki te hiahia koe kia tae koe ki te Rangi, ko te huarahi kei a Hoani 14, 6; ko te tino whamaramatanga o taua huarahi taihoa ka tuhia, ara, ko, "Te Huarahi ki te Ora," i tangohia mai i "Te Karere o te Rongopai," No. 21.

[E Te Pipiwharaua—Tenei kua kite iho i to tono kia tukua atu a taua whakatauki a te Maori, kia tuhia ki to poho, hei titiro ma enei whakatupuranga e haere mai nei. He whakaaro pai tenei. Kei te tatari toru au ki nga kaumatua kia whakamana i to tono, otira kaore ano. He aha ra te take? He nui rawa pea no ratou raruraru. Kaati maku ma te mea mangere e toku atu he paihere whakatauki, e toru tonu nga takakau. Ko enei whakatauki e mohiotia ana e te katoa, he hauwarea noa iho. He aha koa ra, hei timatanga mahi noa pea. I te potopoto rawa o enei whakatauki, i te tino marama hoki o ratou ritenga, na reira i tapiritia atu ai e au. Ki nga kupu-whakawairua. E tumanako ana ahau, e inoi ana hoki me kore enei kupu e manakitia e te Atua hei boatu i te maramatanga ki etahi ngakau pouri. Heoi.

Na to tuahine,  
Te Hineiti Horerere.]